

門生

劉邦謨
王好善編輯

救荒書

本縣地卑而土瘠亦小雨輒潦旬日無雨輒稱旱先生頻歲祈禱兩精誠格天者諸所賑恤皆可為法輯救荒書

查議賑恤公啟

順天府通州寶坻縣為查議賑恤以安民生事
本年肆月二十八日蒙

欽差密雲兵備副使郭

案驗彙

欽差巡撫右僉都御史王

憲牌前事備案仰縣掌

印官查將極貧人口動支官倉粟谷酌量賑貸以救目前之急如果倉無積蓄務要設法或查動無碍錢糧或勸世田富民輸借使小民得沾升斗以免流離事應一行者從便舉行應議請者酌議申報詳奪仍嚴禁衙役里胥不許冒支作弊如不係貧難不行一槩混冒其勸借一事尤要斟酌毋得聽憑工書人等妄報致滋擾害事完先將動支賑濟各數目具由造冊申報本道以憑轉報等因奉此案照先據本縣居仁等

里民王庸等連名告稱本縣地名九河下稍自十三年以來連遭水澇今年夏雨傾注平地一望無際桑田變為滄海蘆舍廢為坵墟田苗盡皆淹沒幸蒙申請勘實災傷題請蠲賑但本縣原無錢糧米蒙賑告乞設法賑濟少延殘喘等情到縣隨該本縣知縣袁 看得子民失所咎在司牧撫字無策致召災荒隨即痛省自新親歷各鄉遍訪民艱歷稽所以救荒之策僉謂連歲饑荒民窮已極若待申請而後賑濟恐緩不及事如欲勸借富民又恐胥吏夤緣為奸更

本誌

二

滋煩擾本縣舊有虞學士古堤一道先經丁知縣修緝遂得數年不潦今若因其遺蹟募窮民修築隨着各有地土之家量出糧食既可以延窮民旦夕之命又可以垂地方永久之利卑職思得先臣蘇子瞻趙閱道皆因救荒大發丁夫濬河修築散富家之積滯濟貧民之艱危史策書之以為美談今本縣利害莫急於修堤尤莫急於疏溝因自循行隴畝見古堤一道起自三岔口至魯沽止長一百三十餘里又有縣南一道通水舊渠一向湮塞理合濬治其餘西北小

堤亦應修理以防不虞因擇義官任邦政安浦
等四名專督修大堤李東陽陳廷仕等六名分
修小堤高選任思忠二名專理開港有僧普照
等執簿勸化善人傳守仁楊尚文等收銀給散
每人每日量助銀三分或二分五厘或二分一
厘不等卑職先將縣倉見貯菑糧三百三十一
石五斗一升內留二百二十石給孤老囚犯等
項月限外其餘糧一百一十一石五斗一升悉
發為顛工之費又本縣各官俱各捐俸以為士
民之倡隨遇鄉官苑園苑時葵等各量力

捐助遠近士民間風樂施而近堤有田之家則
照地出夫各隨其願自二月初一日起工至四
月二十七日始畢約用過夫五萬二千九百五
十餘工銀六百二十一兩五錢七分糧六百三
十一石五斗一升柰自春徂夏兩澤愆期田苗
枯槁又因久潦初乾多生各虫食禾幾盡新種
春麥既無收成之望而工役已畢又無就食之
資四野惶惶朝不謀夕伏蒙俯念特文議賑此
憂民憂國之至情憐窮恤災之美意合縣士民
所當泣血而感戴者也但本縣倉無積穀庫無

羨銀境內稍過之家亦因工役各有施舍不應
重加借貸查得通州常年原有積粟備本州及
各縣之荒而本縣東南一帶渠皆未開堤皆未
築倘蒙憐念照例量發千石或七八百石分給
窮民計工修堤則地利可盡興而飢民可苟延
矣抑卑職又聞之救荒莫若緩征議賑不如止
歛本縣賦役各有定額勢難議減其奉文新增
刑部棘茨內府祭夫等項一千餘兩亦難請免
獨有花板石夫匠車輪本縣原無石匠亦無大
車勢必顧募約每月用銀二百餘兩自五月至

冬季共八箇月約共費銀一千六七百兩查往
年舊例皆出里甲派一科十合縣騷然自卑職
到任以來里甲已革現蒙明文催督已議定價
值暫借公攤銀兩顧發豐潤聽用外思得前項
夫匠車輪去年曾蒙申請 撫臺以荒准免本
縣今年之荒比前更甚加增之稅比前更繁以
嗷嗷待食之民而當力役加徵之苦雖義奉公
不敢開馮婦之口而窮思保障寧能無尹鐸之
心懇乞俯恤災疲照例准免則地方幸甚卑職
幸甚原蒙行仰查議賑二事理未敢擅便擬合

查明盡圖造冊申詳為此今備前由另具書冊具申伏乞

照詳施行

愛惜野稗告示

今歲災荒爾民無食知縣甚苦不能周恤幸天生野稗可以療饑携籃一掃輒有斗餘遠方之民來就食者甚衆爾輩視野穀為常事不知愛惜聞有携稗換酒者何其不自愛也不耕而獲當生慚愧各宜勉強為善以報天地神明之德毋忽

縣志

五

煮粥濟饑告示

民有菜色有司之罪今發穀為糧就東寺煮粥毋論遠近各得就食日二次到者各報名每十人為一牌先盡老者病者幼者次及婦女次及壯丁其老幼婦女係一家者各隨其便同編一牌每一百人分為十牌各有定所每牌各置粥一盂于地盡之即止一千人分為十起以次就食典史仍不時巡察不許和水不許不潔不許

說此示